

Mál nr. 13/2013

Ár 2014, þriðjudaginn 14. janúar, var haldinn fundur í siðanefnd HRFÍ að Síðumúla 15, Reykjavík.

Fyrir var tekið mál nr. 13/2013

X

gegn

Y

og kveðinn upp svohljóðandi úrskurður.

I. Málsmeðferð siðanefndar.

Í erindi kæranda (X) sem barst siðanefnd 15. október 2013 er farið fram á úrskurð siðanefndar vegna þess að kærða (Y) hafi gerst brotleg við grundvallarreglur fyrir félagsmenn HRFÍ með því að para rakkann Z við tíkina Q án þess að rakkinn hafi verið með gilt augnvottorð. Kæran var send kærðu til umsagnar með bréfi dagsettu 16. október 2013 og henni gefinn andmælafrestur til 13. nóvember. Svar barst frá kærðu dags. 23. október og var afrit af því sent kæranda til umsagnar. Kærandi svaraði ekki efnislega en bað um að haldið yrði áfram með málið. Þar eð siðanefnd taldi að öll gögn er máli skiptu væru fram komin þá ákvað hún að taka málið til úrskurðar.

II. Helstu málsatvik og ágreiningsefni.

Samkvæmt innsendu pörunarvottorði dagsettu 15. apríl 2013 var rakkinn Z paraður við tíkina Q hinn 15. desember 2012. Hundarnir eru af hundakyninu Bichon Frise og er rakkinn í eigu kærðu. Við pörunina var rakkinn ekki með gilt augnvottorð. Kærandi telur að með pöruninni hafi kærða brotið gegn grundvallarreglum fyrir félagsmenn í HRFÍ. Kærða svaraði því til að hún hafi ekki vitað að augnvottorðið væri útrunnið fyrr en sótt var um ættbækur fyrir gotið. Hún hafi þá brugðist hratt við og farið með rakkann í augnskoðun og fengið útgefið gilt augnvottorð. Kærðu þykir þetta mjög leitt og hefur lofað að gæta þess að hafa í heiðri framvegis lög og grundvallarreglur HRFÍ.

III. Forsendur.

Samkvæmt grein 2.6 í grundvallarreglum fyrir félagsmenn HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkmið sem gildir fyrir viðkomandi hundakyn og í reglugerð um skráningu í ættbók, reglur sérdeilda segir um hundakynið Bichon Frise:

„Augnskoðun: Vottorð má ekki vera eldra en 18 mánaða við pörun. (Gildir frá 01.01.2011). Greinist hundur með arfgenga vaxandi sjónurýrnun (PRA) fást hvolpar undan honum ekki ættbókarfærðir. Hundurinn, foreldrar og afkvæmi hans eru settir í ræktunarbann (Gildir frá 01.09.2012).“

Óumdeilt er að á þeim tíma sem pörun átti sér stað hinn 15. desember 2012 hafði rakkinn ekki gilt augnvottorð en samkvæmt reglum sérdeilda er ljóst að við pörun hunda af kyninu Bichon Frise skal augnskoðun hafa farið fram og vottorðið má ekki vera eldra en 18 mánaða. Augnvottorð er eitt þeirra vottorða sem áskilin eru við heilsufarsskoðun hundakynsins. Hefur kærða því gerst brotleg við grein 2.6 í grundvallarreglum fyrir félagsmenn HRFÍ .

Kemur þá til skoðunar hver séu hæfileg viðurlög við brotinu. Kærða fór með rakkann í augnskoðun strax og tækifæri gafst eftir að hún gerði sér ljóst að vottorðið var útrunnið og til allra heilla stóðst hann skoðun. Siðanefnd telur það þó ekki breyta brotinu að rakkinn hafi staðist skoðun eftir á. Reglan hljóðar á um að vottorð liggi fyrir við pörun þannig að tryggt sé að hundurinn beri ekki með sér arfgengan sjúkdóm.

En þar eð kærða hefur ekki áður svo vitað sé gerst brotleg við reglur félagsins þykir hæfileg refsing vera áminning.

IV. Niðurstaða

Kærða Y telst hafa gerst brotleg við grein 2.6 í grundvallarreglum fyrir félagsmenn í HRFÍ.

Kærða er áminnt.

f.h siðanefndar

Guðríður Valgeirsdóttir

Hilmar Sigurgíslason

Kristín Sveinbjarnardóttir